

LKIM bertindak beli ikan

Oleh MAISARAH SHEIKH RAHIM
maisarah.rahim@mediamulia.com.my

PUTRAJAYA: Lembaga Kema-juan Ikan Malaysia (LKIM) bertindak segera membeli ikan terus daripada nelayan untuk dijadikan stok penimbal dalam usaha membantu menstabilkan harga dan mengimbangi bekalan bagi menjamin sekuriti makanan negara.

Untuk tujuan itu, sejumlah RM7 juta diperuntukkan sebagai modal pusingan pembelian ikan tempatan sebanyak 1,000 matrik tan sebagai stok penimbal yang akan ditempatkan di 130 bilik sejuk beku di seluruh negara yang mampu memuatkan 1,500 matrik tan.

Dalam masa sama, berkuat kuasa serta-merta, pengguna boleh mendapatkan bekalan ikan segar beku yang dikenali QFish untuk lapan jenis ikan di 135 pasar nelayan LKIM, 103 outlet dan 222 ejen pada harga siling RM10 sekilogram.

Lapan jenis ikan itu ialah kembung, pelaling, selar, selayang, cencaru, aya kurik, selar (pelata) dan tongkol.

Bercakap kepada *Utusan Malaysia*, Ketua Pengarah LKIM, Yusoff Othman berkata, ia sekali gus dapat mengurangkan peranan orang tengah yang dikatakan menindas golongan nelayan dengan menekan harga ekoran pasaran dikuasai kartel.

“Untuk langkah segera kita akan beli stok penimbal melalui program ikan QFish, LKIM akan beli terus daripada nelayan dan bekukan serta edarkan kepada pengguna pada musim tengkujuh pada harga murah.

“Program ini diputuskan dalam Mesyuarat Jawatankuasa Teknikal Sekuriti Makanan Negara yang bersidang pada minggu lepas dan bersetuju dengan cadangan LKIM,” katanya di sini semalam.

Kelmarin, Pengerusi LKIM, Datuk Syed Abu Hussin Hafiz Syed Abdul Fasal mencadangkan supaya agensi berkenaan wajib membeli ikan secara terus daripada nelayan sekali gus melenyapkan peranan orang tengah yang menguasai pasaran dan menindas nelayan.

Akhbar ini sebelum itu melaporkan kira-kira 90,000

nelayan kecil tempatan di seluruh negara mengeluh ekoran nasib mereka tidak berubah sejak sekian lama dan mendakwa ditindas pemain industri gergasi dalam sektor perikanan.

Nelayan-nelayan kecil kira-kira 70,000 orang membabitkan nelayan Melayu itu mendakwa hasil laut mereka terpaksa dijual kepada orang tengah yang turut memiliki bot besar dengan harga rendah kerana mereka ‘tiada akses’ memasarkan hasil laut kepada pemborong.

Mengulas lanjut, Yusoff berkata, persatuan nelayan dan anak syarikat bertindak sebagai pembekal bagi stok penimbal dan rantaian pemasaran ikan QFish, manakala stok akan ditampung oleh syarikat swasta melalui kerjasama persatuan nelayan.

Beliau berkata, pemasaran akan dikembangkan melalui ejen QFish yang dilantik pembekal-pembekal di setiap kawasan berdasarkan kawasan Parlimen termasuk menggunakan medium pemasaran secara digital.

“Setiap 222 Parlimen akan diletakkan dua buah peti sejuk beku untuk menangani masalah kekurangan bekalan ikan.

“Untuk permulaan kita buat melalui anak syarikat dan persatuan nelayan sekali gus membantu golongan nelayan dan membantu semua rakyat.

“Ia demi kebaikan kedua-dua pihak, nelayan dan pengguna, nelayan akan dapat harga cantik, tiada lagi peranan orang tengah,” katanya.

Yusoff bagaimanapun memberitahu, para nelayan sebenarnya boleh menjual hasil tangkapan secara terus di 135 Pasar Nelayan tanpa melalui orang tengah.

Namun, katanya, mereka sendiri memilih untuk menjual kepada orang tengah sedangkan Pasar Nelayan bersedia membeli dengan kadar berpautan.

“Sebelum ikan naik, sudah ada ‘orang’ tunggu dia. Nelayan boleh jual di pasar nelayan atau persatuan nelayan, masalah dia sendiri tak nak jual sedangkan dia membuat pinjaman dengan persatuan nelayan,” katanya.

Hutang punca nelayan terikat orang tengah

UM 29/6/2022 ms: 3

LUMUT: Ramai nelayan kecil terikat dengan orang tengah kerana faktor desakan hidup termasuk mendapatkan pinjaman kewangan mudah dan cepat.

Nelayan pantai yang sebahagian besarnya orang Melayu kebiasaannya akan berhubung dengan orang tengah apabila kesempatan wang terutama ketika cuaca buruk dan tidak dapat turun ke laut dalam tempoh lama.

Pengerusi Persatuan Nelayan Perak (Penggerak) Mansor Yusuf berkata, orang tengah atau disebut ‘tauke’ berperanan sebagai pembeli semua hasil-tangkap nelayan sama ada nelayan yang mempunyai bot sendiri atau nelayan perseorangan yang menjual hasil tangkapan kepada mereka.

“Mereka juga berperanan

sebagai pemberi pinjaman mudah kepada nelayan sama ada untuk duit belanja jika tidak turun ke laut atau duit belanja untuk beli minyak sebab sudah lama tidak turun ke laut atau duit yang ada sudah habis dipakai (dibelanjakan).

“Orang tengah ini juga memberi pinjaman kepada nelayan untuk membeli perkakas atau peralatan yang rosak atau usang,” katanya kepada *Utusan Malaysia*, semalam.

Menurut beliau, pada kebiasaannya ‘tauke’ akan memberikan pinjaman itu secara serta-merta atau dalam tempoh dua atau tiga hari selepas diminta.

Jelasnya, pembayaran pinjaman adalah melalui kaedah potongan hasil tangkapan iaitu berpandukan jumlah hasil jualan diperoleh setiap kali hasil

laut dinaikkan.

“Justeru, adalah tidak adil jika pinjaman mereka (orang tengah) keluarkan (beri kepada nelayan) dan hasilnya pula nelayan jual di tempat lain.

“Perlu juga diakui ada kalanya nelayan tidak melunaskan hutang mereka menyebabkan nelayan terus ‘terikat’ dengan orang tengah,” kata beliau.

Beliau juga memaklumkan bahawa peranan orang tengah berbeza dengan peraih kerana peraih membeli hasil tangkapan yang terpilih sahaja.

Menurut Mansor, peraih hanya membeli hasil tangkapan yang dikenal pasti boleh dijual iaitu bergantung kepada permintaan penduduk setempat.

Beliau memaklumkan, peraih tidak menyediakan apa-apa kemudahan termasuk pinja-

man mudah kepada nelayan dan kebiasaannya harga hasil tangkapan bergantung kepada proses tawar-menawar.

Oleh itu, jelas beliau, harga ikan termasuk ikan kembung dan pelaling bergantung kepada jumlah hasil tangkapan yang didaratkan secara menyeluruh iaitu sentiasa berubah berdasarkan situasi semasa.

Beliau memaklumkan ia sudah menjadi kebiasaan dalam perniagaan iaitu ‘trend’ barangan yg dihasilkkan dan kuasa permintaan sesuatu produk itu.

Mansor mengulas laporan muka depan akhbar ini semalam yang menyebut kira-kira 90,000 nelayan kecil tempatan sedih hidup mereka tidak berubah sejak sekian lama dan ditindas pemain industri dalam perniagaan tersebut.